

28 MAY 1997

Putrajaya-Multimedia

PELAN INDUK PUTRAJAYA DIKEMUKA PADA PERSIDANGAN MULTIMEDIA ASIA `97

KUALA LUMPUR, 28 Mei (Bernama) -- Putrajaya Holdings, pemaju pusat pentadbiran baru, Putrajaya akan mengemukakan pelan induk pembangunannya pada Persidangan dan Pameran Multimedia Asia `97 (MMA `97) yang akan berlangsung pada September.

Tengku Datuk Dr Azzman Shariffadeen, setiausaha tetap Majlis Teknologi Maklumat Negara berkata, Putrajaya dan bandaraya kembarnya Cyberjaya juga akan mengemukakan pandangan tentang bagaimana bandaraya itu akan ditadbirkan dalam konteks infrastruktur dan pentadbiran pada acara antarabangsa tahunan itu.

MMA `97, acara utama antarabangsa mengenai pembangunan projek Koridor Raya Multimedia (MSC) akan diadakan di The Mines Resort City di Seri Kembangan dekat sini.

Perdana Menteri Datuk Seri Dr Mahathir Mohamad dijangka merasmikan acara empat hari pada 16 Sept.

MMA `97 merupakan pertemuan minda yang menyaksikan penyelesaian multimedia dikemukakan dan dibincangkan bagi tujuh aplikasi MSC dan memenuhi keperluan kedua-dua bandaraya pintar, Putrajaya dan Cyberjaya," kata beliau.

Acara itu bertemakan "Moving the MSC from Vision to Reality: Benchmarking Smart Solutions" ialah anjuran bersama Majlis Teknologi Maklumat Negara (NITC), Mimos Berhad, Miller Freeman, Perbadanan Pembangunan Multimedia (MDC) dan Putrajaya Holdings.

Tengku Azman, yang juga Presiden dan ketua pegawai eksekutif Mimos Berhad hari ini menandatangani Memorandum Persefahaman bagi pihak NITC dengan Miller Freeman bagi menganjurkan bersama MMA `97.

Beliau berkata acara itu dijangka disertai oleh kira-kira 250 syarikat yang terbabit dalam pembangunan aplikasi dan perisian serta kira-kira 20,000 pelawat.

Persidangan itu akan menjadi platform bagi membincangkan isu-isu utama dalam pembangunan MSC.

MSC terletak di kawasan seluas 750 kilometer persegi meliputi Putrajaya, Lapangan Terbang Antarabangsa KL (KLIA) di Sepang dan Kuala Lumpur City Centre (KLCC). -- BERNAMA

NI FAZ